

PAGTULON-AN 23 – ANG DUHA KA DALAN GIKAN SA DALAN SA MGA GENTIL NGADTO SA DALAN SA GRASYA

Buhat 13 - 28

TEMA: Sa pagpakita nga ang pagsalikway sa kahayag sa Dios magadala ug kangitngit.


Nakahibalo ka ba sa pagkamahinungdanon sa pulong *gahin*? Tingali ang duha ka tawo adunay maayong relasyon sa panaghigala, apan sila gigahin aron sa pag-adto sa nagkalahing eskwelahan, trabaho o dapit. Sa Bibliya, ang Dios naggahin sa mga butang ug mga tawo alang sa iyang pinasahi nga mga katuyoan. Ang Israel gigahin alang sa katuyoan nga mahimong saksi alang sa kalibutan sa buhi nga Dios. Karon atong tun-an ngano nga napakyas ang Israel, ug ngano nga si Saulo gigahin sa Dios aron sa pagbuhat sa usa ka bag-ong katuyoan.

Human sa pagkakabig ni Saulo miadto siya sa Arabia, ug unya mibalik pag-usab sa Damasco. Human niadto, siya miadto sa Jerusalem diin iyang nahimamat si Pedro ug diin usab siya nakigsulti ug nakiglantugi sa mga Judiong Grecianhon; apan sila naninguha pagpatay kaniya. Sa dihang nasayran kini sa mga igsoon, ilang gidala si Saulo sa Cesaria ug ilang gipalakaw siya ngadto sa Tarsu. Sa dihang nadunggan sa mga kaigsoonan sa Jerusalem ang balita sa nagatubong iglesia didto sa Antioquia, ilang gipadala si Bernabe. Human sa iyang pagdasig kanila, si Bernabe mibiya paingon sa Tarsu aron sa pagpangita ni Saulo; ug sa dihang nakaplagan niya si Saulo, iyang gidala siya sa Antioquia aron sa pag-alagad uban kaniya. Ug didto sa Antioquia ang mga tinun-an gisugdan sa pagtawag nga mga Cristohanon, nga nagakahulogan nga mga “sumosunod ni Cristo.” Galacia 1:17-18, Buhat 9:29,30, Buhat 11:19-26.

Samtang ang mga pangulo sa iglesia sa Antioquia sa Siria nagasimba ug nagapuuasa, ang Espiritu Santo miingon, “Igahin kanako si Bernabe ug si Saulo alang sa bulohaton nga niini gitawag ko sila,” Buhat 13:2. Pinagikan sa Espiritu Santo, sila minglugsong ngadto sa Selucia ug gikan didto milayag sila padulong sa Cipro. Didto sa Pafos ilang gikahibalag ang usa ka salamangkero, usa ka Judio nga propeta nga mini nga ginganlan ug Bar-Jesus (simbolo sa Israel), kinsa kauban sa gobernador nga si Sergio Paulo (simbolo sa Gentil), nga maoy usa ka tawo nga masinabuton. Kining tawhana nagpakuha kang Bernabe ug Saulo, ug gikan kanila nagtinguha sa pagpaminaw sa pulong sa Dios. Apan si Bar-Jesus misupak kanila nga naninguha sa pagpatipas ngadto sa gobernador gikan sa pagkamatinoohon. Apan si Saulo nga ginganlan usab ug Pablo, nga puno sa Espiritu Santo, mitutok kaniya, ug nagtawag kaniya nga anak sa yawa, ang kaaway sa pagkamatarung. Siya miingon nga mabuta si Bar-Jesus ug dili na makakita sa adlaw, Buhat 13:4-11.

Kini nagahulagway sa pagkatig-a sa usa ka bahin sa Israel hangtud sa panahon nga mahisulod ang hingpit gidaghanon sa mga Gentil, Roma 11:25. Unya ang gobernador mitoo sa dihang nakita niya ang nahitabo. Bisan karon ang mga Gentil ginaluwas pinaagi sa pagkapukan sa Israel.

Sila mibiya sa Cipro ug mipanaw ngadto sa Perga ug sa Antioquia didto sa Pisidia. Ug sa adlawng igpapahulay sila misulod sa sinagoga, ang tigumanan sa mga Judio ug miling kud. Human sa pagbasa sa Kasugoan ug sa mga Propeta, sila giagda sa pagsulti sa mga pulong sa pagdasig alang sa mga tawo. Si Pablo mitindog ug miwali sa kapasayloan sa mga sala pinaagi kang Jesu-Cristo ug nga pinaagi Kaniya ang tanan nga motoo igapahigawas gikan sa tanang mga butang, nga gikan niini ang Kasugoan ni Moises wala makahimo sa pagpahigawas kaninyo. Sa pagpanggula ni Pablo ug ni Bernabe, ang mga tawo mihangyo kanila nga kining mga butanga unta isugilon pag-usab kanila sa sunod nga adlawng igpapahulay. Sa pagkasunod nga adlawng igpapahulay, hapit ang tanang nanagpuyo sa siyudad nagkatigum sa pagpatalinghug sa pulong sa Dios. Apan sa pagkakita sa mga Judio sa panon sa katawhan, sila napuno sa kasina ug ilang ginasupak ang gisulti ni Pablo, ug ilang gipasipalahan siya.



Tinubdan: Sweet Publishing – kini ilustrasyon lamang sa Buhat 13:45

Si Pablo ug Bernabe, sa walay kukahadlok, miingon, “Kinahanglan gayud nga ang pulong sa Dios anha igauna sa pagmantala kaninyo. Apan kay inyo man kining gisalikway ug inyong gihukman ang inyong kaugalingon nga dili takus sa kinabuhing dayon, tan-awa, kami mangadto sa mga Gentil,” Buhat 13:13-39. Sa maong pahayag, si Pablo milabang gikan sa DUHA KA DALAN sa mga Judio ngadto sa dalan sa mga Gentil.

Sa panahon sa ikaduhang (2) pagpanaw sa pagwali ni Pablo, siya miadto sa Corinto. Ug didto siya nagapanghimatuod ngadto sa mga Judio nga si Jesus mao ang Cristo, ang Mesias-ang Dinihugan. Apan sa dihang misupak sila ug nagpasipala kaniya, giyabyab niya ang iyang mga sapot ug miingon kanila, “Ang kaakohan labut sa inyong dugo anha sa ibabaw sa inyong kaugalingong mga ulo. Sukad karon moadto na ako sa mga Gentil,” Buhat 18:1-6. Si Pablo milabang na usab pagbalik ngadto sa DALAN sa mga Gentil.

Sa katapusan, miabut si Pablo sa Roma ingon nga usa ka binilanggo. Didto gitugotan siya nga magpuyo sa iyang kaugalingon kauban sa sundalo nga nagabantay kaniya. Sa diha nga ang mga pangulo sa mga Judio nakatakda na ug adlaw sa pagbisita kang Pablo, sila miadto sa iyang gipuy-an kauban sa daghang mga tawo, ug siya nagpatin-aw kanila pinaagi sa matinud-anong pagpanghimatuod sa gingharian sa Dios. Nangingkamot siya sa pagdani kanila mahitungod kang Jesus, pinasikad sa Kasugoan ni Moises ug sa mga propeta, gikan sa buntag hangtud sa hapon. Adunay pipila nga nadani pinaagi sa mga butang nga gikasulti, apan ang uban wala motoo. Ug sa diha nga wala sila magkauyonay ang usag-usa kanila, si Pablo miingon, “Maayo gayud ang pagkasulti sa Espiritu Santo sa iyang pag-ingon ngadto sa inyong mga ginikanan pinaagi kang Isaias...“Busa hibalo ni ninyo nga kining maong kaluwasan gikan sa Dios gikapadala na ngadto sa mga Gentil, ug sila magpatalinghug niini.” Buhat 28:23-28. Uban sa pagpahayag niining mga pulonga, usa ka daku nga ilhanan nga “HUNONG” gipahimutang sa DALAN SA GINGHARIAN. Karon, adunay katig-a o pagkabuta nga nahitabo sa Israel. Ang GINGHARIAN wala mapadayon ug ang Dios nagabuhat ug bag-o, ang tinago nga katuyoan.

Atong nakita nga ang tibuok nasud mipili sa kangitngit kaysa sa kahayag. Unsaon ba nga ang kalibutan mapanalanginan kon ang Israel, ang sandayong sa mga panalangin sa Dios, nagmatig-a? Hinuon, kon atong tan-awon pag-ayo ang mapa, adunay pagliko sa tumoy sa DUHA KA DALAN, usa ka pagliko nga karon ato nang subayon ngadto sa lain nga mahimayaong bahin sa DALAN SA KINABUHI. Ato kining pagatawgon nga DALAN SA GRASYA. Ang grasya nagapasabut walay paghago or takus nga pabor, o gasa sa gugma, nga karon gipakita sa Dios ngadto sa mga *Judio* ug mga *Gentil*, nga dili gayud angayan tungod kay pareho sila nga misalikway sa Dios.

Usa ka butang atong makita dinhi mao ang makalilisang nga resulta sa pagsalikway sa mga Pulong sa Dios. Ikaw ba sad-an usab niana karon? Kondili ka motuman sa Pulong, imo kining gisalikway. Ang padayong pagsalikway sa kahayag magadala ug kangitngit. Ang tibuok kalibutan karon nagkinahanglan nga madala pagbalik ngadto sa kahayag sa mga Pulong sa

Dios. Unsaon? Pinaagi sa pagtoo sa dautang balita; nga ang tanang makasasala nga mamatay nga walay Cristo, angayan mamatay sa ilang mga sala sa usa ka espirituhanong kamatayon nga walay katapusan, maingon man usab sa lawasnong kamatayon, Roma 6:23. Apan pinaagi sa pagtoo usab sa maayong balita; nga “si Cristo namatay alang sa atong mga sala, gilubong ug nabanhaw sa ika tulo (3) ka adlaw,” 1 Corinto 15:1-4, sa maong panahon, ang tawo pagapuy-an sa Balaang Espiritu, 2 Timoteo 1:14, Roma 8:9, 11. Kining panalangin nagaabut uban sa moral ug espirituhanong katungdanan nga mahimong usa ka diosnon nga tagbalay sa Halangdon nga Bisita nga ania sa sulod nato.

SAG-ULOHON NGA BERSIKULO: “Pagmapasalamaton kamo sa tanang higayon, kay kini mao ang pagbuot sa Dios diha kang Cristo Jesus, alang kaninyo. Ayaw ninyo pagpalonga ang Espiritu,” 1 Tesalonica 5:18-19.

PAGTULON-AN 23 – BULOHATON

Direksyon: Isulat ang hustong tubag sa mga pamahayag o pangutana.

1. Asa man si Saulo sa diha nga ang Espiritu Santo miingon, “Igahin kanako si Bernabe ug si Saulo alang sa bulohaton nga niini gitawag Ko sila,” Buhat 13:2. _____
_____.
2. Asa man sila nga isla miadto, Buhat 13:4. _____.

3. Unsa man ang duha ka mga ngalan sa Judio nga salamangkero nga ilang gikahibalag didto sa lungsod sa Pafos? Buhat 13:6, Acts 13:8. _____.
- 4.-6. Ipakita nga ang kasinatian ni Saulo uban kang Bar-Jesus, usa ka hulagway sa unsay pagdumala sa Dios sa Israel karon. Basaha ang Buhat 13:7-11 ug pun-a ang hawan ug imong makita ang tubag.
- Si Bar-Jesus _____ kanila (Pablo ug Bernabe), Buhat 13:8.
 - Ang mga Judio (Israel) napuno sa kasina ug _____ sa mga butang nga gisulti ni Pablo, Buhat 13:45.
 - Si Bar-Jesus naninguha sa _____ sa gobernador _____ gikan sa pagtoo, Buhat 13:8.
 - Ang mga Judio (Israel) naninguha sa pagdili kang Pablo sa _____ ngadto sa mga Gentil, 1 Tesalonica 2:15,16.
 - Si Bar-Jesus gihimong _____ sa usa ka panahon, Buhat 13:11.
 - Ang Israel mahimong _____ hangtud masulod na ang hingpit gidaghanon sa mga Gentil, Roma 11:25.
 - Ug ang gobernador nga si Sergio Paulo _____, Buhat 13:12.
 - Ang mga Gentil usab _____, Buhat 28:28.
- 7.-8. Isulat ang mga bersikulo nga nagapakita unsa ang gisulti ni Pablo sa dihang milabang siya gikan DALAN SA GINGHARIAN ngadto sa DALAN SA MGA GENTIL sa DUHA KA DALAN.
- Buhat 13:46: _____

 _____.
 - Buhat 18:6: _____

 _____.
 - Buhat 28:28: _____
 _____.
9. Sumala sa 2 Tesalonica 2:10-12, unsay mahitabo niadtong dili modawat sa gugma sa kamatuoran aron sila maluwas? Pagalaglagon ug pagahukman sa silot.
10. Isulat ang 1 Tesalonica 5:18,19: _____

